

Gvangjsih Minzcuz Bau

ganbbau: CN45-0036 B.2016 Nd.3 Ng.9 liggaueq bingisaen nienz ndwengeih coit

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3214期

Hong Vah Saw Minzcuz Namzningz Si Yaekaeu Gaem Cungdenj Caux Diemjrongh

南宁市民族语文工作注重抓重点创亮点

Namzningz Si Minvej cujyin Suh Cigangh、Minzyijvej cujyin Mo Swhhungz 3 nyied 2 hauh banhaet bae daengz Swcigih Minzyijvej, bauqlwnh gij cingzvang hong vah saw minzcuz Namzningz Si. Swcigih Minzyijvej fucujyin Yangz Gijbyauh、Vangz Cenzcungh, fusinziyenz Yangz Yigez nem gihgvanh gak cusiz cwng、fucucangj(cujyin) camgya dingq le bauqlwnh.

Gwnz hoih, Suh Cigangh ciuq laebguh minzcuz vah saw canloz doxgap bingzdaiz、cinggouz Swcigih Minzyijvej laebdaeb gyalai doiq Namzningz Si hong vah saw minzcuz haeujcoengh sonyinx ligdoh caeuq gyalai doiq Namzningz Si hong Sawcuengh senhconz ligdoh, yienq Swcigih Minzyijvej guh le cingjsi, Mo Swhhungz ciuq gij dajsuenq bi 2016 Namzningz Si hong cungdenj vah saw minzcuz nem cincanj cingzvang guh le bauqlwnh.

Dingq le bauqlwnh, Yangz Gij-

byauh doiq gij cingzci geij bi neix Namzningz Si hong vah saw minzcuz aeundaej haenx guh le cungfaen haengdingh, caemhcai ciuq baenz-lawz caenh' itbough guh ndei bi 2016 aen si neix hong vah saw minzcuz daezok le yigen.

Yangz Gijbyauh giengzdiuh, Namzningz Si hong vah saw minzcuz aeu roengsim gaem cungdenj, dajcaux diemjrongh, daiqdoengh cienzmienh. De genyi bi 2016 cungdenj gaem ndei sam hangh hong: It dwg hopheux Namzningz Si hong cauxguh daengx guek minzcuz doxgiet cinbu si guhyienh, nyinhcaen yenzgiu dingh-ok fueng'anq hong song vah saw huzndei segih hwnjguh caemhcai nyinhcaen cujci hengzguh; genyi Namzningz Si densidaiz youq Vuj-mingz hailaeb si gaep densidaiz Vahcuengh binzdau, Guengjsae Gvangjbo Dendaiz、Guengjsae Densi-daiz youq gizhaenx laeb Vahcuengh cezmuz hoizcaux cungsim. Ngeih dwg

aeu Swcigih Yinzminz Cwngfuj baecinj haiguh hong Vahcuengh Sawcuengh suijsingz gaujsi cangzdaiva guh seiz-ndei, cungfaen fatok gij gingniemh fungfouq Namzningz Si laebdaeb 4 bi camgya hong sawqdiemj Vahcuengh Sawcuengh suijsingz gaujsi aeundaej haenx, youq seiz guhhong gaujsi cangzdaiva guh ok gungyen moq. Sam dwg aeu gij gveihcangh cwngfuj okdaiz haenx——《Namzningz Si Sawcuengh Ndawbiengz Sawjyung Guenjieix Banhfap》guh giekdaej, caenh' itbough doidoengh Namzningz Si minzcuz vah saw laebfap cincwngz.

Vangz Cenzcungh、Yangz Yigez doiq baenzlawz guh ndei hong vah saw minzcuz Namzningz Si faenbied daezok le genyi. Swcigih Minzyijvej gak lingjdaiz camgay hai hoih haenx cungj naeuz, yaek youq ndaw gvaengxlaengx cizgenz haenqrengz haeujcoengh Namzningz Si hong vah saw minzcuz.

(Moz Hungz/莫宏)



Yungzsuij:

Mehmbwk Mbanjmyauz Fouxdoengh Ciet "Sam Bet"

融水:大苗山妇女舞动“三八”妇女节

3 nyied 4 hauh, youq "sam bet" gozci ciet mehmbwk daeuj daengz gaxgong, Yungzsuij Myauzcuz Swciyen banh mehmbwk foux-gvangjangz doxdax, daengx yienh Myauz、Yauz、Cuengh、Gun daengj minzcuz mehmbwk gapbaenz 34 aen daiyaujdui camgya doxdax, vih bouxyawj yienh ciengz fouxgvangjangz ndeiawj he. Ndaw doz dwg duiyenz cingq doxdax.

(Liu Swjyenh/廖子渊)

Denswjbanj 《Sam Nyied Sam》Cazci (Banj Sawcuengh) Youq Guengjsae Minzcuz Bau Vangj Cingqsik Haidoeng 《三月三》杂志(壮文版)电子版在广西民族报网正式开通

Bonjbauq siusik (gicej Cau Dwzfeih) 3 nyied 3 hauh, denswjbanj 《Sam Nyied Sam》cazci (banj Sawcuengh) youq Guengjsae Minzcuz Bau Vangj cingqsik haidoeng.

《Sam Nyied Sam》cazci (Banj-sawcuengh) youq 1986 nienz 9 nyied okbanj, dwg minzcuz vwnzyoz ganhvuz aeu Sawcuengh okbanj, aeu fatbiuj gij vwnzyoz cozbij saujsu minzcuz daezcaiz caeuq gungganq Sawcuengh bouxsij guhcawj, daeng gak minzcuz ndawbiengz vwnzyoz caeuq gij vwnzyi cozbij fanjyingj daihneix saujsu minzcuz yienhsaed saedceij, caemh-caiq hong vah saw saujsu minzcuz nem yenzgiu faenzcieng. Gij cunghcij banh cazci banj Sawcuengh dwg yienh' ok daegsaek minzcuz, fanjyingj fungcingz bonjdieg, hoenghvuengh vwnzva minzcuz, gungganq vwnzmoq vwnzyoz,

hwngfat vwnzyoz Bouxcuengh, vih gyagiengz minzcuz doxgiet、hwnjguh gizdieg Bouxcuengh seveicujyi cing-saenz vwnzmingz fuzvu. Bonj cazci neix youq ndaw guek rog guek fathengz, rog guek Meijgoz、Yizbwnj、Audaliya nem guek raeuz Yanghgangj、Daizvanh daengj 14 aen guekgia caeuq gizdieg cungj miz vwnz dingh. Bonj cazci neix ndaej daengz haujlai guekrog lauxhangz gvamsim. 2006 nienz 6 nyied, bonj cazci neix bous fucungjbenh ndeu ndaej iucingj bae daengz Daigoz Majhihlungz Dayoz son'gyauq Bouxcuengh vah gangj vwnzva caemhcai gaisau 《Sam Nyied Sam》cazci (banj Sawcuengh). Feih-couh Gyahnaz lauxhangz Bozaidunh daeuj fangjvwn 《Sam Nyied Sam》haujlai baez he gvaq, cibgeij bi daeuj, de itcig gag ok cienz dingh 《Sam

Nyied Sam》cazci (banj Sawcuengh).

Bonj cazci neix fwnfwn rumzrumz gvaq ndaej 30 bi lo, doiq doihengz yung Sawcuengh caeuq fatyiengz Guengjsae minzcuz ndawbiengz vwnz-va fatok cozyung gig hung. Daj cauxlaeb daeuj, gonqlaeng miz 30 lai bien faenzcieng ndaej hoiz baenz Sawgun, youq 《Yinzminz Yizbau》《Minzcuz Vwnzyoz》《Minzcuz Cozgyah》fatbiuj. Miz 20 lai bien faenzcieng ndaej swngjgaep doxhwnj ciengj, gungganq le buek vwnzmoq vwnzyoz Sawcuengh he. Linghvaih, 《Sam Nyied Sam》lij gungganq le buek youh buek moq saujsu minzcuz cozgyah caeuq bouxvwnzva minzcuz, gyoengqde daj gizneix okbae, faenz-cieng gyoengqde ndaej guekgia gaep、swngjgaep ciengihung.

SIUSIK DINJ

简讯

● 3 nyied 2 hauh daengz 4 hauh, Swcigih Minzvej fucujyin Couh Gen daengj 3 bous bae daengz Namzningz Si Majsanh Yen guh diuyenz, caemhcai ciuq minzcuz yangh banh laebbaenz cib hopbi angqhoh hozdung hong couzbwh nem minzcuz doxgiet cinbu cauxlaeb hozdung haeuj yanghcin daengj hong guh genjcaz sonyinx.

(Veiz Sangyungz)

● 3 nyied 4 hauh, youq Lungzswng Gak Cuz Swciyen singzbaek segih, dangdieg mehmbwk camgya guh' angq hozdung. Mboengqneix, aen yienh neix haiguh le 《Fap Fanj Gyaranz Bauqlig》senhconz、"sam bet" mehmbwk henhoh gienzlig cihsiz gyangjco、gungzhoj daxmeh byaij-cunz camnai、guh' angq daengj hozdung angqhoh "sam bet" ciet mehmbwk.

(Veiz Gizyangz)

● 3 nyied 4 hauh, Ningz-mingz Yen song gaep gohhez、dicingiz、vanzbaujgiz daengj bumwnz lienzhab youq Ningzmingz Yen Cwngzcungh Cin Gyanghbinh Dadau haiguh gohbuj cihsiz haeuj segih hozdung. Gak bumwnz doenggvaq yienhciengz yienjlien beizyin、fat swhliu senhconz、bajok canjbanj daengj fuengsik guh gohbuj cihsiz senhconz, sonyinx segih vunzlai laeb gij saedceij gvanhnen caeuq saedceij fuengsik gohyoz vwnzmingz、gaenxmaenx doxhwnj.

(Couh Yizganh Cwng Cunghswng)

● Mboengqneix, Fuconh Yauzcuz Swciyen gunghsangh bumwnz iucingj mizgven lauxhangz daeuj bangcoengh gunghsangh bumwnz bous hengzfap ok banhfap nyinh rox caen gyaj nungzsw, vih fugsach dangqnaj bouxguhnaz seizcin dajndaem cawx nungzsw gemjnoix sonjsaet ok banhfap.

(Cinz Yengiz)

● Geij bi neix daeuj, Yizcouh Si Daihsam Siuzyoz haenqrengz dajcaux bingzanh hagdangz, aeu gyaudoeng ancienz、fuengz dwk-roengz、fuengz feiz daengj ancienz gyauyuz hozdung bingzciengzvaq, mizyauq daezsang le gyoengq lauxsae hagseng gag gouq gag hen yisiz caeuq naengzlig. Bi 2015, aen hagdangz neix ndaej bingz baenz Hozciz Si "hagdangz ancienz guenjieix hagdangz maenhndei".

(Veiz Canghyoz Cangh Givaz)